

BOSNA I HERCEGOVINA
FEDERACIJA BOSNE I HERCEGOVINE
UNSKO SANSKI KANTON
OPĆINSKI SUD U BIHAĆU
Broj: 017-0-Su-23-001077
Bihać, 25.08.2023. godine

Na osnovu člana 31. Zakona o sudovima u Federaciji Bosne i Hercegovine („Službene novine Federacije Bosne i Hercegovine“ broj: 38/05, 22/06, 63/10, 7/13, 52/14) I člana 8. Pravilnika o unutrašnjem sudskom poslovanju („Službeni glasnik Bosne i Hercegovine“, broj: 66/12, 40/14, 54/17, 60/17 i 30/18), a u skladu sa zaključcima Visokog sudskog i tužilačkog vijeća Bosne i Hercegovine usvojenim na sjednici održanoj 24. i 25. maja 2023. godine, predsjednik suda je dana 25.08.2023.godine, donio

Plan aktivnosti predsjednika suda u procesu unapređenja sistema kvaliteta pravosuđa i vremenski okvir za njihovu implementaciju

TRANSPARENTNOST RADA SUDA

Cilj provođenja ove aktivnosti jeste promjena percepcije javnosti, kako o radu ovog suda tako i o sveukupnom radu pravosuđa, upotrebom savremenih komunikacijskih alata kojima će se trenutna komunikacija učiniti proaktivnijom, rad suda transparentnijim, a građanima i javnosti informacije o radu suda učiniti dostupnijim.

Potrebno je povećati transparentnost rada suda kroz izdavanje saopćenja za medije, izjave za medije, objavu potrebnih informacija o radu suda na web i facebook stranici suda.

Navedeno podrazumijeva da sud blagovremeno, jasno i precizno izvještava javnost o svim bitnim informacijama u vezi sa radom suda, načinu vođenja postupka, donošenju zakonitih presuda, ispravnom tretmanu stranaka i javnosti od strane suda i ažurnosti postupka.

Sa realizacijom ove aktivnosti, koja je trajnog karaktera, otpočeti odmah.

KONTINUIRANA EDUKACIJA SUDIJA I STRUČNIH SARADNIKA

Cilj provođenja ove aktivnosti jeste stalno usavršavanje sudija i stručnih saradnika i unaprjeđenje njihove profesionalnosti radi dostizanja standarda koji će omogućiti sudu da u narednom periodu još više poboljša efikasnost i kvaliteta rada, te institucionalno jačanje Općinskog suda u Bihaću

Stoga je neophodno u neposrednim razgovorima sa sudijama i stručnim saradnicima, kao i na stručnim kolegijima suda poticati sudije i stručne saradnike da se prijavljuju na edukacije koje će najviše doprinijeti kvalitetu njihovog rada i kvalitetu njihovih odluka, te ih stimulisati da permanentno rade na podizanju kvaliteta rada, ukazivanjem na značaj kvaliteta njihovog rada kroz postupak ocjenjivanja.

Ova aktivnost je trajnog karaktera.

MJERENJE KVALITETA RADA SUDIJA I STRUČNIH SARADNIKA

Uspješnost rada sudija i stručnih saradnika cijeni kroz mjerila kvaliteta, što podrazumijeva procjenu vođenja sudskog postupka, odnos sudije i stručnog saradnika prema strankama i javnosti, efikasnost postupka, stručnost sudije i stručnog saradnika i upravljanje postupkom.

Procjena kvalitete vođenja postupka se vrši kroz kriterije kao što su: nezavisnost i nepristrasnost sudije u postupanju, transparentnost postupka prema strankama i javnosti, efikasnost i ekonomičnost postupka, podsticanje stranaka na zaključenje sudske nagodbe i slično.

Procjena kvaliteta presude se vrši kroz kriterije kao što su: zakonitost presude, jasno, uvjerljivo, detaljno i razumljivo obrazloženje koje i stranke i stručnu zajednicu uvjerava u ispravnost odluke, opća pismenost u izradi odluke.

Tretman stranaka i javnosti u postupku se cijeni, prije svega, na osnovu poštivanja njihovog ljudskog dostojanstva, na osnovu dostavljanja svih neophodnih informacija o postupku i po osnovu ostvarene komunikacije sa javnosti.

Ažurnost postupka se cijeni na osnovu poštivanja optimalnih i predvidivih rokova, poštivanja vremena iniciranja postupku u njegovoj prvoj fazi i na osnovu mišljenja stranaka o dužini trajanja postupka provođenjem određenih anketa.

Stručnost sudije i stručnih saradnika se cijeni na osnovu njihovog profesionalnog ponašanja tokom postupka, njihovog redovnog prisustva edukacijama, stavu stranaka i advokata o pripremljenosti sudije i stručnog saradnika za postupanje u predmetu provođenjem određenih anketa.

Organizacija suđenja i vođenje postupka se vrši u skladu sa procesnim zakonima, sudije i stručni saradnici su raspoređeni po referatima, postoji sigurnost učesnika u postupku i sudskog osoblja.

Ovu aktivnost provesti do kraja godine a potom je nastaviti i u narednom periodu.

UJEDNAČAVANJE SUDSKE PRAKSE

Usaglašena i dosljedna sudska praksa je važan dio pravne sigurnosti, te će se promovisati dosljednost u tumačenju i citiranju sudske prakse samog suda, Kantonalnog suda u Bihaću, Vrhovnog suda FBiH, Ustavnih sudova F BiH i BiH, i međunarodnih sudova, uz puno uvažavanje i poštovanje principa sudijske nezavisnosti.

Na stručnim kolegijima i na sjednicama sudskih odjeljenja potrebno je kontinuirano analizirati odluke ovog suda, odluke Kantonalnog suda u Bihaću i Vrhovnog suda F BiH u cilju harmonizovanja sudske prakse.

Sve naprijed navedeno će nesumnjivo uticati na bolju percepciju javnosti prema pravosuđu.

Sa ovom aktivnosti započeti odmah i provoditi je kontinuirano.

SARADNJA SA VIŠIM SUDOVIMA

Potrebno je insistirati na periodičnim sastancima suda sa Kantonalnim sudom u Bihaću, eventualno i sa Vrhovnim sudom F BiH, s ciljem harmonizacije sudske prakse i unapređenja kvaliteta sudskih odluka, kroz otvoren dijalog i razmjenu pozitivnih iskustava

Ovu aktivnost provesti do kraja 2023. godine a potom je nastaviti i u narednom periodu.

PROMOVISANJE MIRNOG RJEŠAVANJA SPOROVA

Kontinuirano, u skladu sa pozitivnim propisima, ukazivati strankama na mogućnost mirnog rješavanja sporova, na značaj i pogodnosti mirnog rješavanja sporova, naročito u periodu održavanja „Sedmica sudske nagodbe“.

PRAVO GRAĐANA NA JEDNAK PRISTUP PRAVDI

Kao nezavisna, profesionalna i efikasna pravosudna institucija, zakonitim i transparentnim radom ovaj sud će osigurati svim građanima jednak pristup pravdi kao jednom od osnovnih ljudskih prava, posebno u kontekstu onih kategorija društva koje su izložene bilo kojem obliku diskriminacije.

Pristup pravdi mora biti jednak za sve građane pred sudom, a odnos nosioca pravosudnih funkcija prema svim korisnicima pravosudnog sistema mora biti isti, bez obzira na porijeklo, rasu, spol, dob, vjeru, nacionalnost, društveni ili ekonomski status, kao i svaku drugu okolnost koja ima za svrhu ili posljedicu da bilo kojem licu onemogući ili ugrožava priznavanje, uživanje ili ostvarivanje na ravnopravnoj osnovi, prava i sloboda u svim oblastima života.

Jedna od najvažnijih aktivnosti, u sklopu prava građana na jednak pristup pravdi, koja se provodi u Općinskom sudu u Bihaću jeste da ovaj sud do kraja 2024.godine postane 100% pristupačan osobama sa invaliditetom.

Ova aktivnost je trajnog karaktera.



Predsjednik suda
Aladin Bajrić